

•
〔明〕茅坤 編

唐宋八大家文鈔

第二冊

歐陽修文鈔

〔上〕

黃山書社

歐陽文忠公文鈔

目錄

歐陽文忠公文鈔引		(一一四三—一二四八)
歐陽文忠公本傳		(一一四九—一二五四)
歐陽文忠公文鈔目錄		(一一五五—一二九〇)
歐陽文忠公文鈔 卷一		(一二九一—一二三四)
歐陽文忠公文鈔 卷二		(一二三五—一二六八)
歐陽文忠公文鈔 卷三		(一二六九—一二三四)
歐陽文忠公文鈔 卷四		(一二三一—一二五二)
歐陽文忠公文鈔 卷五		(一二五三—一二九二)
歐陽文忠公文鈔 卷六		(一二九三—一二四四)

歐陽文忠公文鈔

卷七

（一四二五—一四五〇）

歐陽文忠公文鈔

卷八

（一四五一—一四八四）

歐陽文忠公文鈔

卷九

（一四八五—一五三六）

歐陽文忠公文鈔

卷十

（一五三七—一五七八）

歐陽文忠公文鈔

卷十一

（一五七九—一六二二）

歐陽文忠公文鈔

卷十二

（一六二三—一六四六）

歐陽文忠公文鈔

卷十三

（一六四七—一六七六）

歐陽文忠公文鈔

卷十四

（一六七七—一七〇二）

歐陽文忠公文鈔

卷十五

（一七〇三—一七三二）

歐陽文忠公文鈔引

西京以來獨稱太史公遷以其馳驟跌宕悲慨嗚咽而風神所注往往於點綴指次獨得妙解譬之覽仙姬於瀟湘洞庭庭之上可望而不可近者累數百年而得韓昌黎然彼固別開門戶也又三百年而得歐陽子予覽其所序次當世將

相學士大夫墓誌碑表與五代史所爲
梁唐二紀及他名臣雜傳蓋與太史公
畧相上下者然歐陽子所與友人論文
書絕不之及何也又如奏疏劄子當其
善爲開陳分別利害一切感悟主上於
漢可方晁錯賈誼於唐可方魏徵陸贄
宋仁廟嘗諭庭臣曰歐陽修何處得來

殆亦由此序記書論雖多得之昌黎而
其恣態橫生別爲韻折令人讀之一唱
三歎餘音不絕予所以獨愛其文妄謂
世之文人學士得太史公之逸者獨歐
陽子一人而已而世之人或予信或不
予信又或訾其間不免俗調處嗟乎抑
誠有之太史公之傳仲尼弟子與循吏

處抑豈能與刺客同工哉觀之日月猶
有抱珥可知之矣予讀唐書五代史別
有鈔今錄其文集行世者首上皇帝書
疏六首次劄子并狀五十三首次表啟
二十二首次書二十五首次論三十五
首次序三十一首傳二首次記二十五
首次神道碑銘墓誌銘四十七首次墓

表祭文行狀二十三次頌賦他雜著
一十首釐爲三十二卷噫姪桂嘗以予
酷愛歐陽公敘事當不讓太史公遷且
前曰歐陽公撰五代史當時將相特並
齷齪不足數况兵戈之後禮崩樂壞故
其文章所表見止此假令同太史公抽
石室之書傳次春秋戰國及先秦楚漢

之際豈特是而已哉譬之一人焉入天子圖書琬琰之藏而陳周彝漢鼎犧樽雲壘以相博古一人焉特入富人者之室所可指次者陶埴菽食而已予唯唯嗟乎世之欲覽歐陽子之全必合予他所批注唐書五代史而讀之斯得之矣歸安鹿門茅坤題

歐陽文忠公本傳

歐陽修字永叔永豐人修四歲而孤母鄭氏有女節以荻畫地教修書字稍長從鄰里借書讀或手抄之抄未竟而成誦舉進士有聲補西京留守推官召試學士院遷鎮南軍節度掌書記館閣校勘修爲人質直閎廓見義敢爲機穽在前直行不顧每放逐困蹙輒數年及復振起終不改其操范仲淹貶知饒州諫官高若訥獨不言修遺書責之坐謫峽州夷陵令稍近至太子中允館閣校勘修崇文總目改集賢校理知太常禮院數論天下事以貧求補外得通判滑州仁宗增諫官員用天下名士召修知諫院未幾用修同修起居注閱月拜右正言知制誥初呂

夷簡罷相夏竦爲樞密使復奪之代以杜衍同時進用富弼韓琦范仲淹等石介作慶曆聖德詩言退姦不易進賢之難而終篇意在夏竦竦不悅因與其黨造爲黨論目仲淹衍及修爲黨人修乃上朋黨論又上疏言杜衍韓琦范仲淹富弼相繼罷去爲黨論者尤惡修異已又善言其情狀至使內侍藍元震上疏賴仁宗終不之信修使河東其所建議尤多會保州兵叛出修爲龍圖閣直學士河北都轉運使初修出河北仁宗面諭曰勿爲久居計有事言來修對曰諫官乃得風聞今在外使事有指越職罪也仁宗曰有事但以聞勿以中外爲詞爲黨論者愈益惡之乃坐用張氏奩中物買田立歐氏氏券左遷知制誥知滁

州久之遷起居舍人知揚州徙潁州復龍圖閣直學士知應天府以母憂去既免喪入見仁宗惻然怪修髮白問在外幾年今年幾何恩意甚至命判流內銓小人恐修復用僞爲修奏乞澄汰內侍書騰都下宦者切齒楊永德者陰以言中修出知同州外議不平論救者衆遂留判修唐書爲翰林學士加史館修撰勾當三班院改侍讀學士知蔡州未行復爲翰林學士判太常寺修在朝以獎進天下士爲已任延譽尉薦極其力而後已於經術治其大旨不爲章句不求異於諸儒景祐中與尹洙皆爲古學已而有詔戒天下學者爲文使近古學者盡爲古文修遂爲天下宗匠蜀人蘇洵嘗論修文章詞令雍容似李翱切近實

當似陸贄而修之才亦似過此二人至修作唐書至五代史敘事不媿劉向班固也權知貢舉文士以新奇相尚文體大壞修深革其弊前以怪僻在高第者黜之幾盡務求平淡典要士人初怨怒罵譏中稍信服已而文格變而復正拜右諫議大夫判尚書禮部又判秘閣秘書省加兼侍讀辭不受同修玉牒兼龍圖閣學士權知開封府承包拯威儀之後一切循理不事風采或以爲言修曰人材性各有短長實不能舍所長彊其所短以給事中罷同提舉諸司庫務改羣牧使唐書成拜禮部侍郎爲樞密副使未幾參知政事預定策英宗初年親政事慈聖光獻太后垂簾修與二三大臣佐佑兩宮鎮撫四海執政聚議事有

未可修未嘗不力爭臺諫官至政事堂論事往往面拆其短英宗嘗面稱修曰性直不避衆怨自嘉祐以後朝廷務惜名器而進人之路稍陋修屢建言遂詔韓琦曾公亮趙概及等各舉五人其後中選者多在清近朝廷亦稍收其用矣又因暇日盡以百司所行兵民官吏財用中書所當知者集爲總目上有所問宰相以總目對修以奉祠假家居上遣內侍就中書閣取而閱之蔣之奇讒之修遂稱疾力解機務以觀文殿學士刑部尚書知亳州年六十矣乞致仕者六不從遷兵部尚書知青州除檢校太保宣徽南院使判太原府三辭不受徙知蔡州以老病乞骸骨章數上乃爲觀文殿學士太子少師致仕卒年六十有六

贈太子太師謚文忠修議濮園事雖不叶羣議然結髮立朝讜
直不回身任衆怨至於白首而謗訕不已卒以不汚年六十以
論政不合固求去位可謂有君子之勇矣修博極群書好學不
倦集三代以來金石刻爲二千卷校正史氏百家譌謬之說爲
多所著易童子問三卷詩本義十四卷居士集五十卷內外制
奏議四六集又四十餘卷子發奕裴辨